

*Wartawan-wartawan  
Melayu bergambar  
ramai setelah  
berjaya menu buhkan  
persatuannya.*



## PERSATUAN WARTAWAN MELAYU DITUBUHKAN DI SINGAPURA

Pada bulan Januari yang lalu, wartawan-wartawan Melayu di Singapura (termasuk tiga orang dari Persekutuan Tanah Melayu) telah berjaya menu buhkan persatuannya. Persatuan ini terbuka kepada semua wartawan-wartawan Melayu Singapura dan *Federation*.

Pegawai-pegawai "Persatuan Wartawan Melayu" bagi tahun ini ialah tuan-tuan: 'Abdul Şamad Isma'īl (Utusan Melayu) Yang di-Pertua, Kamāluddīn Muhammad (Warta Negara) Naib Yang di-Pertua, Abū Zakī (Harmi) Setiausaha Yang Kehormat, Ramlī 'Abdul Hādī (Radio Malaya) penolongnya Sayyid 'Umar al-Saqov (Geliga) Penyimpan Wang, manakala ahli-ahli jawatankuasa: 'Uthmān Wowo' (Utusan Melayu), Maḥfūz Ḥamīd (USIS), 'Abdullāh Ḥusīn (Qalam), dan Buyung 'Adil (Radio Malaya).

Pemeriksa kira-kira: Ḥusīn 'Abdul Ḥamīd (USIS) dan Asraf Hāji 'Abdul Wahāb (Bintang) dan pemangku-pemangku amanah ialah Usman Awang dan Muhammad Ṣaleḥuddīn (Utusan Melayu) serta Sayyid Sālim Bāmidhāj (Suasana).

Mesyuarat dipengerusikan oleh Cikgu Buyung 'Adil.

Mencampuri Perjuangan Kemerdekaan  
Dan Meninggikan Darjat Kewartawanan Melayu

Persatuan Wartawan Melayu yang tersebut adalah "berasaskan kebangsaan dalam erti kata berusaha mencampuri perjuangan kemerdekaan bangsa dan juga memperjuangkan hak-hak asasi manusia dengan tidak terpengaruh oleh suatu faham politik dari sebarang anggota persatuan...."

Selain daripada itu akan berusaha melaksanakan lima tujuan: Pertama-menyatukan wartawan-wartawan Melayu dan memperteguh perhubungan dengan wartawan-wartawan lain seluruhnya. Kedua-memeperjuangkan dan mempertahankan hak-hak bersuara dan hak-hak menyatakan fikiran yang melaras dengan dasar demokrasi. Ketika- mempertinggikan mutu dan darjat kewartawanan

Melayu yang selaras dengan keperluan-keperluan dan kepentingan-kepentingan masyarakat.

Keempat-turut berusaha kearah perkembangan-perkembangan dan kesempurnaan persuratkhabaran Melayu di Malaya khasnya dan persuratkhabaran Malaya umumnya selagi tidak bertentangan asas-asas dan tujuan persatuan ini.

Kelima-turut berusaha dalam segala lapangan kebanggaan yang ada hubungan dalam lapangan kewartawan Melayu selagi

usaha tersebut tidak bertentangan asas dan tujuan-tujuan

serta kepentingan-kepentingan persatuan.

### Anggota-anggota

Persatuan tersebut terbuka kepada wartawan-wartawan Melayu yang lahir atau bermastautin dan mempunyai taat setia yang tidak berbelah bahagi kepada Malaya (Singapura dan Federation) dan menganggap negeri ini sebagai tanah airnya.

## -----KETAWA DENGAN WARTAWAN-----

### Kumpulan Dermawan

“Kita telah mendengar kata-kata seperti belanjawan, setiawan, biduan, dan sasterawan; maka sekarang tibalah pula masanya kaum “dermawan” menubuhkan persatuannya”.

Kata Cikgu Buyung Bin ‘Adil, Sebaik-baik sahaja beliau menjalankan tugas menjadi pengerusi mesyuarat pada hari penubuhan “Persatuan Wartawan Melayu”.

Di dalam gelak ketawa orang ramai, tuan pengerusi telah berpatah balik lalu menerangkan bahawa maksudnya yang sebenar tadi ialah kaum “wartawan” bukan kaum “dermawan”!

### Sayyid Mahfuz

Sekali lagi majlis riuh dengan ketawa kerana Saudara Mahfuz Hamid telah disebut oleh tuan pengerusi dengan panggilan; “Tuan Sayyid Mahfuz”!

“Aduh!” kata Pak Mat ( Muhammad Isma‘il ‘Abdul Qādir) yang kebetulan duduk di sebelah ana.

Ketika itu kelihatan “Hantu Wak Ketusuk” menepuk-nepuk bahu Mahfuz sambil ketawa berdekah-dekah

sehingga nampak dari jauh gigi rongaknya.

### Bakhtiār Punya Pasal

Agaknya kerana saudara Bakhtiār Jamīlī banyak sekali bercakap, berdebat dan berceramah, mujurnya tidak bercerakah; menjadikan tuan pengerusi kecoh dan terlajak menyeru hadiri dengan berkata:

“Tuan Pengerusi!”

### Tamatlah Siaran Kita

Tetapi “banyak” yang paling seronok ialah ialah ketika tuan pengerusi menyerahkan majlis lalu berkata sebagai penutup: “Tuan-tuan! Dengan ini tamatlah siaran kita!”

Cikgu Buyung terus ketawa bersama-sama dengan majlis yang sedang riuh dengan gelak ketawa sedang hati kecilnya agaknya tidak lupa mendayu-dayu dengan berkata:

“Tempat jauh lagi dikenang  
Inikan pulak tempat bermain!”

Abū Nawās